



# DAKOTA TAWAXITKU KIN

OR

## THE DAKOTA FRIEND.

PUBLISHED MONTHLY BY THE DAKOTA MISSION.—G. H. POND, EDITOR.

VOL. II.

ST. PAUL, MINNESOTA TERRITORY, MARCH, 1852.

NO. III.

Imanija Skadan, Wi Ici, 3, 1852.

### Jesus Oran Wanji Oyakapi.

Judeya makoce kin en, otonwe wan Betani eciyapi; unkan hen wicaxta wan Lazarus eciyapi, tawinortin om ti. Hena wamdenicapi nace. Jesus otonwe iyaza un qa oyate wahokonwicakia eca, ake Lazarus ti kin en i ece keyapi. En wicai qa wovicakiyaka eca, oie kin waxte dakapi qa cante iyorpayapi qa on tawacin waxtepi. Hececa nakax, Jesus waxte wicadake ca ohanhdewicaya. Hen i eca, canwaxteya tiyopa kiyurdokapi, qa siha hide kin en iyotankapi qa ie cin anagoptan yukampi ece, qa nakun tautanyan eca kiconpi ece keyapi. Jesus eya eceon ece qon wanna ake eceon eceon qa Taku Wakan Iyotan un kin he oie yuha otonwe iyaza un qa oyate wovicakiyaka. He icunhan, Lazarus wayazanke ca ta keyapi. Wicaxta okinhan nakax oyate ota en ai qa kicanpi. Wanna tancan xice kte cehan, wicaxta hnakapi ekta ayapi qa rapi. He te xni qon he ehan, Jesus tokiya un hecinhan ekta hoxi kaipi, qa kicopi; tuka i xni. Ta itopa can hehan i keyapi.—Hen i unkan oyate piya ceyapi, qa wicota Jesus kici, hnakapi kin ekta yapi. Hen ito Jesus Wakantanka cekiya. Ayaxtan qehan, Wicaxta hnakapi kin de yurdoka po, eya. Wanna rwinmua keyapi qa tokaheya wicadapi xni, tuka kitan qehan, eceon eceonpi. Unkan hotankakia Lazarus hdicu wo, eya; unkan Lazarus ni hdicu, qa tiyata ki qa hetanhan wanietu ota ni un, qa oyate ota wanyakapi qa ia naronpi.

Iho hena heceken Wowapi—Wakan en oyakapi. John wowapi kaga cin en Wicowoyake iyake wanjica (John Chap. 11.) kin he dawapi kinhan, he he de e dawapi kta.

### Matthew 7: 15—27.

15. Wicaxta wakan wicakapi xni kin hena on wakta unpo. Hena tarinwanu-yampi tawokoyake koyakapi, qa ekta nihipi tuka tanmahen xonktokeca wayapon unpi hecapi.

16. Waskuyeca tawapi kin eciyatanhan isdonwicayayapi kta. Taspanhu kin etanhan hastanhanka yuxpapi he? qa tokahu kin etanhan suke yuxpapi he?

17. Can kin tona waxte eca, owasin waskuyeca waxtete aicage, ca can tona xica eca, hena waskuyeca xixxice aicaga ece.

18. Can wanji waxte echantanhan token waskuyeca xixxice aicaga pica xni; qa

nakun can wanji xica echantanhan, token waskuyeca waxte aicage pica xni.

19. Can kin tona waskuyeca waxte aicage xni kin hena owasin kawankapi, qa petan erpeyapi ece.

20. Hecen on wicaxta wakan waskuyeca kin on eciyatanhan isdonwicayayapi kta.

21. Tona Itancan, Itancan, emakiyapi kin hena owasin marpiya ekta tin iyayapi kte xni; tuka marpiya ekta atewayaya tawakunze kin he eceon eceonpi kin hena eepi kta.

22. Anpetu kin he en wicota hemakiyapi kta, Itancan, Itancan, nicaje yan wauntapi xni he? qa nicaje yan Wakaxica napeunyanpi xni he? qa nicaje yan wicoran wakan ota eceon eceonpi xni he?

23. Tuka hehan decen ewicawakiye kta. Tohini sdonciyapi xni, oran oniwotanpidan xni kin mitantanhon iyaya po.

24. He on etanhan, tuwe mioie kin dena naron qa eceon eceon kinhan, he wicaxta ksapa wanji imanija akan ticaga he imdacin kta.

25. Hecen mini hinhe, ca minitan u, qa tateyanpa, qa tipi kin he en iheya, tuka imanija akan hdepi kin on jujuwahe xni.

26. Tuka mioie kin dena, tuwe naron qa eceon eceon xni kinhan he wicaxta witkotkoka wanji wiyaka akan ticaga he iyececa.

27. Hecen mini hinhe, ca minitan u, qa tateyanpa, qa tipi kin he en iheya, qa jujuwahe ca tankaya woatakuni xni.

Jesus oyate wahokonwicakia eca hena heceken ewicakia. Akta yawa qa iyukean owacinpo. Tuwe iapi ecedan on tuku opa echantanhan he wicake xni.

OYATE WANJI TAKU WAKAN TAWAPI KIN IHANGKIYAPI OYAKAPI.—Miniyowanca akotanhan makoce wan wanke ca India eciyapi. Hen oyate ota yakonpi tuka ikcewicaxtapi qa tuku wakan icicagapi qa cewicakiyapi. Tipi wakan wanji kagapi qa tuku wakan tawapi ohna wicakihdepi, qa hen ipi qa cewicakiyapi ece tuka keyapi.

Hena hecetu tuka Waxicunwakan he sdonyapi qehan, onxiwicadakapi qa Wakantanka oie kin yuha ekta ipi qa naronwicayapi. Hececa unkan ota Wakantanka tawakunze iyorpayapi qa Jesus wacinyanpi. "Unkiye tuku wakan yuha unkiyagapi qon he ehanqon tuku xni tuka hecen unkanpi qon; nakaha tuku onspeunkiyapi kin de waxte," eceonpi.—Taku wakan tokeca mitokam duhe kte xni, Wakantanka eye cin he naronpi qa

wicadapi nakax tipiwakan ohna tuku wakan kihdepi qon hena ihomeca ihangyapi kta keyapi qa tipi wakan qon ekta wicota yapi. Wanjikxi cante sutapi kin hena ito tokahanpi qa tin iyayapi eca, wanji Jesus cekiyec ca heya. Ho, Jesus onximada qa omakia ye, eye ca tuku wakan hiyeye cion wanji ape ca padan kin kaksax erpeya. Hehan wicota qon upi qa tuku wakan hdepi qon owasin makata kaksaksa erpewicayapi qa tipi nakuu tanyerin yujujupi, qa hehan heyapi, "Wiuntkotkoka, qa tuku dececa cewicunkiyapi qon," eyapi, qa owasin tankan toke cion erpewicayapi. "Dena takudan on ounkiyapi xni qon iye niiciyapi e ca kax okitpanipi ce," eyapi.

Tuka oyate apa tuku wakan qon hena terindapi qa ikapta unpi qa heyapi, "Witkotkoke duke cin de tokeca ce tuku wakan unkitawapi owasin ihangunyakiyapi he? oyate hena wacinwicayapi qon! eyapi. Tokexta xihdapi qa onxiyaya niuwapi kinhan sdonyakiyapi kta ce, teriya tuku ayakipapi kta ce," eyapi.—Unkan, tuku wakan ihangwicayapi qon ix hehan ake heyapi. Dena maka heca, qa unkiye unnapipi kin on wicunkagapi, dena tuku xihda iyececa kaca, Jesus he ixwana wakan qa he ceunkiyapi kta, dena onxika ce kowicunkipapi kte xni," eyapi, keyapi.

Iho oyate tuku wakan tawapi kin hena tuku xni ihducenpi qa erpewicayapi, qa Wakantanka tawakunze iyorpayapi owicayakapi.

### Pajojodan.

Wakpa Minisota ohna tukte oeti waxte eca, pajojodan hiyeye cin hena tuwe kaga hecinhan?

Tacanrpi waju tuka qon ireyata tanhan Sagdaxin ti kin hen heca yukan. Sagdaxin wanji yurdokapi unkan, cardi acetipi heca qa wicaxta hu ko iyeyapi.

Eca, tohini oyata tokeca hen tipi tuka toka tokiyatanhan ahi qa wicaxta timahen yanka ecehnahan ktepi qa tipi ideyapi eca, mahen toxu ehnapipi qa iyakan maka ehnapipi qa otipi, toxu qon hena gu eca owasin jujuwahan qa wicaxta ktepi qon iyahdaskin hinrpaye ehececa naceca apa eyapi.

He hecetu hehan ake Tacanrpi Sapa cihintku ktepi qon he ehan rapi kta unkan, pajodan wan tokeca yurdokapi, unkan inyun, wicapahu wicahi ko yazapi se hiyeye iyeyapi keyapi. Unkan he eca, wannakaja oyate tokeca den unpi qehan

pajojodan dena eceken wicaxta hnakapi ece tuka nace apa eyapi.

Uman tukte wicakapi tuwe sdonyayapi hecinhan, ito Dakota Tawaxitku kin wowapi kicage ca oyaka wo.

Wowakapi, unkan, ehanna qehan Dakota wanji wakanpi cin qa wihamdeciye kta on Ptansinta ireyata pajodan wauji cokaya yurdoka, unkan mahen wicahu ota extanhan ohna ito yanke ca tuku wakan ota kin wanji ihande kta kecin, tuka otpaza eca, wanagi ota qa nina jopi eca, kokipe ca najica hducu keyapi.

Dakota tuku wakan ihamnapi terika, tuka dehan Taku Wakan wanji Iyotan un kin he tawakunze onspeiciyapi waxteke: Cekiyapi qa Wowapi Wakan yawapi qa eceon eceonpi eca on okihipi.

WICAXTA WANJI WAMANU KTA TEKA, OYAKAPI.—Wicaxta wan, token tawaga ekta wannahaza manu i ece. Tokaheya ixnana hecen xkan tukaonhanketa cihintku hokxidun wan kici i, keyapi. Unkan cihintkudan qon heciya, "Cinx, wajuha yus najin wo, ito waawakite kte; okini tuwe wanunyake kte," eye ca conkaxke akan inajin, qa ohomnimni waakita, tuka tuwedan wanyake xni qehan, wajuha qon chdaku, qa ojutan aya. Unkan hokxidun qon heya, "E, ate ohomnimni eyatonwan tuka wanji aye ktunja ce," eya. Unkan atkuku nihiciye ca wajuha ayuxtan iyeya eca, "Cinx, tokiyotan he?" eya. "Hiya ate, Wakantanka okini wannayaka nuncce ecani, qa wankanitoheya eyatonwan tuka he ayektunja ce" eya. Unkan iteccc ca wannahaza manu hi qon, ongedan manun xni, tiyata hde ca hokxidun tuku eciye cin he kiksuya un, qa wamanusa qon he hecerin ayuxtan, qa ohini, "Wakantanka ahitonwan yanke" eciun un keyapi.

"Taku xica ecamon exta tuwedan wannayake kte xni," tuwe eciun exta he wicake kte xni. Tuwe wanji ixtamdeze rinca ohiniyan ahitonwan yanke, ca takudun nuni xni.

OEHDE PETCEDAN.—Wahonspiciyaya wo, qa tuku ota onnispe kta. Miniheca qa wapatan wo, qa tuku ota yaton kta.—Taku yutapi iyatahdeciye xpi, qa miniwakan yatke xni un wo, qa zaniyan yanun kta. Canteoze oran ko-owotanna wo, qa wocantewaxte iyenicieye kta. Iho hena iapi hecetu eceon eyapi.

Wicaxtayatapi wanji waxte eca, tawakaya tanyan otanin.